



UKA 2017/38  
13. novemberi 2017  
Bendt B. Kristiansen

**Pillugu: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2017-imeersoq.**

(Aningaasaqarnermut Naalakkersuisoq)

Naalakkersuisut saqqummiussaannut qujavugut.

Inuit Ataqatigiit mittarfiliortiternissamik pilersaarutip Kalaallit Airport A/S aqutigalugu aningaasalersorniarneqarnerat mianersortumik inuiaqatigiinnullu kingunissaanik eqqarsaatigilluagaasumik aningaasalersorneqassasoq isumaqarfigaarput.

Inatsisissatut siunnersuut manna inuiaqatigiit toqqaannartumik akileeqataatinneqannginnissaannik siunertaqartoq paasivarput, taamatullu iluseqarnera iluarisimaarlutigu.

Siunnersuut naapertorlugu aningaasat PFA Soraarnej-up PFA Pension-imut qallunaat nunaannut nuuttussaananeranut PFA Soraarnej suleqatigilluinnarlugu siunnersuut ilusilersorneqarsimasoq paasivarputtaaq. Paasivarput siunnersuut inatsisartunit akuerineqassariarpat qallunaat nunaanni Aningaasanik Aqutsisoqarfimmit (Finanstilsynet) akuersissut qinnutigineqassasoq kingornalu soraarnerussutisiassat nuunneqarsinnaalerumaartut.

Soraarnerussutisiassat nuunneqariarpata nunatta karsiata iluanaarutissaasa mittarfiliortiternermut toqqaannartumik aningaasaliissutigineqarnissaat Naalakkersuisut siunertaringaat paasinarpoq, soorlu aamma taamatut siunertaqartumik aningaasanut inatsisissami saqqummiussisoqareersoq. Taamatut periuseqarniarneq innuttaasut mittarfiliortiternermi toqqaannartumik akileeqataannginnissaannik siunertaqarmat iluarisimaarparput.

Maannakkut maleruagassut atuuttut malittuugutsigit akileraarutinik A-nik pissarsiassat Namminersorlutik Oqartussat kommunillu agguarlugit tutsinneqartussaapput, siunnersuummili matumani akileraarutit A-t tamakkiisumik mittarfiliortiternernut tutsinneqarnissaat siunertarineqarpoq, mittarfissuarliortiternerit erniaasa qaffasippallaannginnissaannik siunertaqartumik. Inuit Ataqatigiit siunertarineqartut paasivarput.

Uparuanngittoorsinnaanngilarpulli siunnersuutip saqqummiunneqannginnarani kommuninut tusarniutigineqarsimannginnera, taamaattumik kissaatigaarput

# INUIT ATAQATIGIIT

## Inatsisartuni



siunnersuutip aappassaanneerreqannginnarani Akileraartarnermut Aningaasaqarnermullu ataatsimiititaliami suliarineqassasoq, ataatsimiititaliallu kommunit siunnersuummi eqqorneqartussat tusarniapallattoqarsimanerani oqariartuutaat ilanngullugu isummersorfigineqassasut.

Ilanngaasiinnginnermi akileraarusiisarnermut aaqqissuussinerup malitsigisaanik inuup isertitaasa 35 procentianik akileraartussaataasooq inaarutaasumik akileraarummik akiliisassasoq paasivarput, paarlattuanik pineqartut inuttut ilanngaammik il.il. atuisinnaatitaassanngittut. Inuit Ataqatigiit ernummatigivarput tamassuma kinguneranik sulisartut nunaqavissut akiluttortinneqalerataannaanerata, tamatumalu pinngittoortinneqarnissaa Naalakkersuisut ingalasimatinniassangaat sakkortuumik piumasaraarput kingunereratarsinnaasaanillu Inatsisartunut ersarissaateqassasut. Immikkoortoq taannarpiaq kommuninut tusarniutigineqarsimasariaqaraluarpoq, taamaattumik uteqqillarput siunnersuutip aappassaanneerreqannginnarani kommunit siunnersuummik eqqorneqartussat oqaloqatigineqarnissaat pinngittoorsinnaasorinngilarput, siunnersuutigalugulu aappassaanneerreqarnissaata pingajussaanneerreqarnissaatalu ullui kinguartinneqassasut, aamma oqaluuserisassap ippassaq eqqartorneqanngittoornerata kingunerisaanik kommunit oqariartuutaat ataatsimiititaliamut saqqummiunneqarumaartut neriutigaarput.

Siunnersuutip aningaasaliisartunik avataaneersunik oqaloqateqarnermut pingaaruteqassusaa mittarfiliortiternermilu innuttaasunut artukkiinaveersaarnissamik siunertaqarnera paasilluarparput.

Taamak oqaaseqarluta aappassaanneerreqannginnarani Aningaasaqarnermut Akileraartarnermullu ataatsimiititaliamut suliakkiutigineqassasoq inassutigaarput, takusinnaavarpullu siunnersuut maanna ataatsimiinnerup ingerlanerani naammassineqassappat minut-it tamarmik atorluarneqartariaqartut.